



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

LIBANGA 12

SISWATI LULWIMI LWASEKHAYA (HL)

LIPHEPHA LEKUCALA (P1)

LWETI 2012

EMAMAKI: 70

SIKHATSI: 2 ema-awa

Leliphepha linemakhasi la-12.

TICONDZISO KULABAHLOLWAKO

1. Leliphepha lehlukaniwe tigaba LETINTSATFU:

SIGABA A: SIVISISO	(30)
SIGABA B: SIFINYETO	(10)
SIGABA C: LUHLELO NELULWIMI	(30)
2. Phendvula yonkhe imibuto ngeSiswati.
3. Fundza tonkhe ticondziso ngekucopehelela.
4. Cala leso naleso sigaba ekhasini lelisha.
5. Shiya umugca emkhatsini wetimphendvulo takho.
6. Tinombolo tetimphendvulo atihambisane naleto letisephepheni lemibuto njengobe tinjalo.
7. Caphelisisa sipelingi/lupelomagama nendlela lewakha ngayo imisho.
8. Bhala ngebunono nangesandla lesifundzekako.
9. Siphakamiso sekulawulwa kwesikhatsi:

SIGABA A: Lokungenani emaminitsi lange-45	
SIGABA B: Lokungenani emaminitsi lange-45	
SIGABA C: Lokungenani emaminitsi lange-30	

SIGABA A: SIVISISO**UMBUTO 1**

- 1.1 Fundza lethekesthi lelandzelako bese uphendvula imibuto letawulandzela.

ITHEKSTHI A

Endzimeni yekucala bantwana bangemashumi lamatsatfu. Emkhatsini walabantwana kukhona umfana wakaKhumalo, Mdzelwa. Lomfana wondze ngendlela leyesabekako. Thishela wakhe wambita ngalelinye lilanga, 'Mdzelwa.'

'Medemu.'

'Buya lapha utewungitjela kutsi udliwa yini ungangelutsi lwekuvungula ematinyo nje.'

Wasondzela Mdzelwa.

'Hlala lapha ebhantjini ngive. Uyagula yini mfana wami?'

'Cha Medemu angiguli.'

'Kepha kwente njani? Batsi nabadlako lekini wena bakubophele emshayweni?'

'Cha Medemu Makhubu.'

'Khumula lelibhantji phela kuyashisa. Waliphiwa ngubani lelelikhulu kangaka?' Uyasondzela Medemu uyamphatsa.

Wakhwasha Mdzelwa alibambisisile libhantji lakhe. 'Ngaliphiwa ngumkhulu Bhembe. Ngingeke ngilikhumule ngobe ngembetse lona lodwana lamuhla ngitiwashile timphahla tami.'

Amyekele Medemu, kodwa asole ngenhlitiyo kutsi kukhona intfo langayicondzi kahle ngalomfana.

Naku-ke ngakusasa nguLesitsatfu, lilanga lemidlalo. Badlale bantwana. Emantfombatane ayagijima, lamanye ancaka libhola, ngulabo benta loko labakhetse kukwenta. Bafana nabo nguleso. Labanye basuka emagonso, labanye bakhahlela libhola njengekuholeka kwabo.

Kwatsi kulabo labagalujako, lomunye wawa kabana walimala. Kwavele kwabonakala kutsi phindze, angabe asachubeka nekudlala, sekufanele ahlale phasi abukele labadlalako nobe abuyele etindlini tekufundzela ayofundza tifundvo tengcondvo. Nango-ke asakokola abuyela etindlini tekufundzela. Atsi utsi chamu abone kutsi yele ngelifasitelo, kutsi khwace ngelikhabethe. Kufike engcondvweni yakhe kutsi konje sonkhe sikolwa sacelwa kugadza tigangi letintjontja kudla emagabheni ebafundzi. Wabese uhamba kancane ngekcaphela kutsi angabangi umsindvo longetfusa leso sigangi.

Watsi uyasondzela kulendlu yekufundzela weva kukhala emagabha. Wema waba njengalofile kwaba sengatsi akaphefumuli. Ahambe ngemantontolwane angene atsi ngcwa nekwemfana, kunalomkhulu umtsamo, ngesandla sekudla kuphetse lokunye kudla, ngalesinye kuphetse ligabha lelivuliwe. Kutsi khwemetisi kwemfana. Ligabha kulibuyisele ngemuva kwako, kanye nesandla lesinekudla. Emlonyeni kulinge kutsi nyamfu kanye kabili kumite. Umtsamo ukubambe emphinjeni kute kugwilitise emehlo abe bovu, agcwale tinyembeti, kuphefumule kamatima, sekumane kuveva nje. Ingani umtsetfo ubekwe nako kukhona. Sekuyabona nje kutsi nangabe lomfana lokubambile angakuhawukeli kwafa kona ngemivimbo ngemuva.

'Ya! Kantsi nguwe lolosacedza kudla kwetfu emagabheni? Ngakukhandzanisa-ke lamuhla. Ungabe usalibeka phasi leligabha, ungakulahli futsi ungasakudli nalokudla lokusesandleni. Ngikuyisa kuMatinyo unje.' Ukhuluma nje lomfana uyakhinyeta ucondze kuko. Afike akutsi mfo sona lesandla lesigcwele siphuphe setindlubi akudvonsele ngaphandle.

'Phutfumani bo! Nangu lomtsakatsi sengimbambile! HHeyi bo! Yelekelelani!'

Kwabe abakeva bantfwana, kwatsi labaphangise beva bawuchubela embili umkhosi. Labanye bagijima baya kuGala.

'Hhewu! Hhewu! Selandzini yehhe! Selandzini!'

'Kahle wakitsi.' Kumemeta Jabulani, lomunye wetindvuna letinkhulu letibekwe bafundzi. Bafundzi besebaphelele ngetinkhani. Kute thishela lowabona wangashaywa luvalo ngoba bekubonakala kutsi kungahle kwenteke ingoti umfana afele ekhatsi kwetifupha njengentfwala.

'Gijima ushaye insimbi kakhulu,' nguThishelanhloko asho kulomunye umfanyana. Wayidvumela ngemakhumelo umfana.

'Nke-nke, nke-nke'. Ngalensimbi kwabhidlika sihhoncahhonca lesasesakhelwe Mdzalwa bafundzi balalela lomkhulu. Walawula bafana kutsi babuye netinswati, labekwa nelibhantji.

Njenganyalo sesitawucacabula umhlane wesedzeleli ngentfonga! Buya Mdzalwa. Khipha tandla emakhukhwini. Khumula libhantji ulale kulesitulo!'

'Ngicolele thishela, ngeke ngiphindze nanini.'

'Mzizi nawe Madvolo mbambeni nimkhumule lelibhantji nimlalise ebhantjini.'

Besuka kanyekanye bamkhumula libhantji balijika le. Bobabili betfuka bakhapha emehlo, imilomo yavuleka. Bonkhe bantfwana nabothishela bamangala kutsi silwane sini lesi lesime embikwabo. Umntfwana wondze ubona lapho kwehlukana khona ematsambo. Naye Matinyo, thishelanhloko, wetfukile.

Ngalesosikhatsi Mdzalwa uyabibitseka.

[Umtsango – G Pato: p3]

Phendvula yonkhe imibuto ngekubhekisa tonkhe timphendvulo takho kuletheksthi lengenhla.

1.1.1 Usuke entani umuntfu nakakhinyeta? Khetsa imphendvulo kuletilandzelako:

- A Azubazuba.
- B Achuta.
- C Anyonyoba.
- D Ashakutela.

(1)

1.1.2 Belibangelwa yini lelibhantji laMdzalwa kuba likhulu?

(1)

1.1.3 Bhala mcondvofana waleligama lelidvwetjelwe kulomusho lolandzelako:

Atsi utsi chamu abone kutsi yele ngelifasitelo.

(1)

- 1.1.4 Wakhombisa ngayiphi indlela Mdzelwa kutsi akafuni kukhumula libhantji lakhe? (1)
- 1.1.5 Yini lebangela kutsi lutsi lwekuvungula lufaniswe nemuntfu lowondzile? (1)
- 1.1.6 Sento saMdzelwa Hulumende usincobe ngayiphi indlela etikolweni talomuhla? (1)
- 1.1.7 Yini imbangela yekweba kwaMdzelwa? (1)
- 1.1.8 Chaza lombono lotsi Mdzelwa abengafela ekhatsi kwetitfupha njengentfwala ubhekise kulokwenteka kuletheksthi. (1)
- 1.1.9 Nakungatsiwa Mdzelwa uyagula, wena ungatsi uphetfwe ngusiphi sifo? Bhekisa imphendvulo yakho kulokwenteka kuletheksthi lengenhla. (2)
- 1.1.10 Bekentelani Gala kutsi loku kwemfana kungalibeki phasi ligabha nekudla lokusesandleni kukubambe njalo? (2)
- 1.1.11 Ngekubona kwakho yini leyabangela kutsi kube nguJabulani kuphela lowekhutako kungabi ngunobe ngumuphi umfundzi? Sekela. (2)
- 1.1.12 Ngekwemtsetfosisekelo waseNingizimu Afrika, Matinyo abengaboshwa avalelwe ejele. Bekungabangelwa yini loko? (2)
- 1.1.13 Kushaywa kwensimbi kube naliphi ligalelo kulomshikashika losendzabeni? Chaza. (2)
- 1.1.14 Ngekubona kwakho ngabe tigwebo letinyenti letinikwa bantfwana labafana naMdzelwa tibafanele yini? Sekela imphendvulo yakho. (2)

1.2 Fundza lesibonwa lesingentasi bese uphendvula imibuto letawulandzela.

ITHEKSTHI B

[<http://www.inherittheearth.net/streetkids>]

- 1.2.1 Yini kutsiwe bantfwana labafana nalaba bondzindzasitsebeni? (1)
- 1.2.2 Mikhuba mini levamise kwentiwa bantfwana labafana nalaba? Nika munye. (1)
- 1.2.3 Ngutiphi tifo letingangena labantfwana labakulesibonwa? Bhala sinye. (1)
- 1.2.4 Ucabanga kutsi yini lebenta balale ngalendlela labalele ngayo lapha emgwacweni. Nika kunye. (1)
- 1.2.5 Lesimo lesikuletheksthi sivamise kutfolakala kutiphi tindzawo? (1)
- 1.2.6 Kubangelwa yini kutsi labantfwana bahlale etimphambanweni tetindlela? Nika sizatfu sibe sinye. (1)
- 1.2.7 Kuvamile kutsi bantfwana labafana nalaba labakulesibonwa bahlale eceleni nemigcomo yetibi. Wena ucabanga kutsi kubangelwa yini loku? (1)
- 1.2.8 Ngekwakho kubona, nguliphi lichaza lelingabanjwa nguhulumende waseNingizimu Afrika kunciphisa timo letifana naleti. Nika kunye. (1)
- 1.2.9 Lesibonwa lesingenhla LESIKUTHEKSTHI B sinabuphi budlelwano nalenzaba LEKUTHEKSTHI A? (2)

SAMBA SIGABA A: 30

SIGABA B: SIFINYETO**UMBUTO 2**

Fundza letheksthi lelandzelako bese uyayifinyeta ngewakho emagama langabi ngetulu kwala-70, uvete **tintfo letisikhombisa letimcoka ekugcineni imitimba yetfu iphilile futsi ingangenwa tifo kalula.**

TICONDZISO

1. Finyeta ngewakho emagama ukhokhe emaphuzu lamcoka lasikhombisa.
2. Sifinyeto sakho asibe ngendlela yetindzima (emapharagrafu) NOBE indlela yemaphuzu.
3. Emaphuzu akho akabe imisho legcwele.
4. Nangabe sifinyeto sakho singendlela yemaphuzu, nika emaphuzu akho tinombolo (1–7), kodwa nangabe singetindzima, dwebela lamaphuzu lasikhombisa.
5. Khombisa linani lemagama lowasebentisile ekugcineni kwemphendvulo yakho.

**INDLELA YEKUGCINA UMTIMBA UPHILILE, UPHEPHILE
NASEKUNGENWENI TIFO KALULA**

Indlela lesiphila ngayo kute imphilo yetfu ibe ngulephephile nalendze ibaluleke kakhulu. Tinyenti kakhulu tintfo letincane naletinganakeki, lesingatishayi mkhuba kantsi tingumgogodla wekuphila nekuphepha etifeni. Lokunye lokuyingoti kakhulu kutsi letinye taletintfo tiba nemtselela etimphilweni talabanye labanakekelako.

Tintfo letinjengekugeza tandla nangabe umuntfu bekaye endlini lencane, atinakeki kantsi tingabanga tifo letingaze tiholele ekufeni kwemuntfu nasekutseleleni labanye tifo. Ngete waba nesiciniseko kutsi tandla tihlanteke ngalokuphelele emva kwekuphuma endlini lencane. Kusuka lapho ubambe kudla nobe uhlephulelane lokudliwako nalabanye. Akusashiwo phela nangabe umuntfu uphetfwe sifo sekuhanjiswa sisu, ngobe ute adzinwe kugeza tandla kantsi kulapho sekatidvonsela emanti ngemsele. Nangembikwekudla nako kubaluleke kakhulu kugeza tandla ngobe umuntfu ubamba tintfo letinyenti letehlukene ekuhambeni kwelusuku. Letinye taletintfo tingaba yingoti natidliwa, kantsi nakungumkhuba lowetayelekile wekugeza tandla ngembikwekudla loko kuyakuphephisa.

Esikhatsini lesinyenti bantfu babamba imishuco babhikishela emanti lahlantekile, babukeke ngatsi abayati intfo labayentako. Emanti ngulenywe yetintfo letandzisa tifo nangabe angakahlanteki. Tifo letifana nemsheko nemchamongati tandza kalula nangabe emanti angakahlanteki. Kuwabilisa ngembikwekuwanatsa nangabe angakahlanteki, kungaphephisa sive.

Imitimba yetfu iyakudzinga kuhlala icinile nemalunga ayo ahlale ahlahlambile. Nangabe umtimba uhlala ugocobele ungahlahlambi, ingati ingashukuniswa ngalokufanele uchubekisela tifo letibucayi embili, njengetifo letifana netifo taboshukela, tifo tematsambo, tifo tenhlitiyo naletinye. Loko kudzinga kutsi umtimba uvocavocwe kusitana nemitsi yekwelapha leto tifo.

Kudla lesikudlako nako kuneligalelo lelimcoka ekwenteni umtimba uhlale uphile kahle ungangenwa tifo kalula. Labo labanendzawo lenkhulu bayecwayiswa kutsi bangalima tibhidvo netitselo ngobe tinemsebenti lomcoka ekwakheni imitimba yetfu. Esikhatsini lesinyenti kuvame kutsi bantfu batidlele inyama nalokunye bakhohlwe tibhidvo netitselo, lokungulokunye kwekudla lokunemphilo. Nasemuva kwekudla loko kudla lokunemphilo, kubalulekile kutsi kugezwe ematinyo ngobe loko kunciphisa tilondza emlonyeni. Kute ematinyo ahlale ahlantekile kumele ahlukuhlwe katsatfu ngelilanga.

Yona lemitimba yetfu ledzinga kudla lokunemphilo iyadzinga kutsi ihlale ihlantekile, igezwe njalo kute ingangenwa tifo kalula. Tifo letifana nelukhwekhwe, naletinye letihlasela sikhumba tingena kalula emitimbeni lengagezwa. Loku kuvame kakhulu ebusika ngobe bantfu batsi kumakhata, abafuni kungenwa makhata ngekuloku bangena kanyenti emantini. Kuncono kuvikela kugula kunekulindza kutsi sifo sikungene bese ngukhona ucala kuphaphama. Phela tjani lobulele buvuswa ngumlilo.

Tonkhe letintfo letibukelwa phasi etimphilweni tetfu ngatsi ummango ungahlala njalo ushiyelana ngato lapho uhlangene khona ngobe phela injobo itfungelwa ebandla kantsi futsi indlela ibutwa kulabasembili.

[Icanjiwe]

SAMBA SIGABA B: 10

SIGABA C: LUHLELO NELULWIMI**UMBUTO 3**

Fundza letheksthi lelandzelako bese uphendvula imibuto letawulandzela.



[<http://www.kingfeatures.com>]

3.1 Usho kutsini lomake nakatsi, 'angicalimithi'? (1)

3.2 Sisuke sentani silondza nasibhibha? (1)

3.3 Shano kutsi lesinongo lesidvvetjelwe siluhlobo luni?

Bantfwana labagcobisa Velabahleke bacwebetela njengelilanga.

Khetsa imphendvulo kuleti letilandelako:

- A Sifanamsindvo
 - B Sifutamsindvo
 - C Sifanisongco
 - D Sifaniso
- (1)


3.4 Yini lebangela lokhangisako asebentise tinhlavu letinkhulu kuleligama lelilandzelako:

'VELABAHLEKE' (1)

- 3.5 Buso balabantfu labadzala labakulesitfombe buhambelana ngani naleligama lalamafutsa? (1)
- 3.6 Lisebentani leligama lelidvwetjelwe kulenkhumo lelandzelako letsetfwe kulesikhangisi lesingenhla?
- NguVelabahleke kuphela lowenta sikhumba sebantfwana sibe sihle futsi sishelele. (1)
- 3.7 Ligama lelitsi inkhulisa kuletheksthi liyanemba ngenhokutsi yalo. Beka umbono wakho ngalombono. (2)
- 3.8 Faka inselelo kulenkhumo lelandzelako letsetfwe kulesikhangisi:
- Bantfwana labagcobisa Velabahleke abalimali futsi abagatuki, baphila sikhatsi lesidze. (2)
- [10]

UMBUTO 4

Fundza lekhathuni lelandzelako bese uphendvula imibuto letawulandzela.



[<http://www.kingfeatures.com>]

- 4.1 Khokha umusho locuketse luvelomagama lolukhomba lutsandvo kulekhathuni lengenhla uwubhale phasi bese uyaludwebela loluvelomagama. (1)
- 4.2 Phindza ubhale lomusho, esikhundleni seligama lelidvvetjelwe ubhale mcondvofana walo.
Lamuhla kunetibiliboco njengangakhisimusi. (1)
- 4.3 Sebentisa leligama lelilandzelako emshweni kukhombisa kutsi uyalati kutsi lisho kutsini.
Tinyatselo. (1)
- 4.4 Lesisho lesidvvetjelwe kulomusho lolandzelako ngabe sisho kutsini?
Ngafa yindlala futsi sengilole nematinyo. (1)
- 4.5 Yakha umusho ngesifutamsindvo lesisetjentiswe kulekhathuni lengenhla. (1)
- 4.6 Sigitjelwa lesigitjelwe nguletitsandzani sikhomba kutsi bekungusiphi sikhatsi semnyaka? (1)
- 4.7 Tsatsa ligama lelidvvetjelwe, enkhulumeni 9 kulekhathuni lengenhla, ulisebentise emshweni lotakhele wona kute kuvele inchazelo leyehlukile kulena lekulenkhumo. (2)
- 4.8 Lesaga lesitsi, 'ingoma lemnandzi iyaphindvwa' sihambelana kangakanani nalokwenteka kulekhathuni? (2)

[10]**UMBUTO 5**

Fundza lethekesthi lelandzelako lenemaphutsa elulwimi bese uphendvula imibuto letawulandzela.

Kadze kwasa Hulumende atjela bafundzi kutsi babokwenta ticelo tendzawo yekufundza emanyuvesi kusenesikhatsi. Bafundzi abanandzaba, kwabo kuphikilishana nabomakhalekhukhwini bayekele kufundza. Linyeti labo aliye esikolweni libhema umtfunti wetinkhukhu. Lokungemantfombatane kona kuchuba tisu kuye nato etikolweni. Nakhona etikolweni akwenti lutfo kuyazula nje. Ummango ubafisela kuphumelela kute babe baholi bakusasa. Loko abakushayi mkhuba batsi batawubona ngemiphumela. Bafundzi batsi abakutsandzi kulandzelelwa etifundvweni tabo. Bati kahle kamhlophe lokulindzeleke kubo.

Umcimbi wekuvalelisa labafundzi belibanga lelishumi nakubili wentiwa ngembi kwekutsi kuvalelwe emaholide entwasahlobo. Wonkhe umuntfu labesemcimbini akawuvali umlomo. Utsi bekukhangiswa tembatfo takanokusho temali leshisiwe. Kudla akusakhulunywa ngako, bekutidvuli tebasali.

Thishelanhloko nabothishela bafuna baphumelele ngemalengiso etifundvweni tabo. Batali bona bayangabata, ababetsembi bantfwababo. Basho nekusho kutsi imisebenti yesikolo bebangayenti, bothishela bebakhala onkhe emalanga. Esikolweni bagcina ngeMgcibelo lowengcile. Inkinga lenkhulu kutsi abaketayeli nekutifundzela.

[Icanjiwe]

- 5.1 Khokha umusho loneliphutsa lelulwimi kuletheksthi lengenhla, uwubhale phasi bese ulungisa leliphutsa. (1)
- 5.2 Phindza ubhale lomusho ulungise liphutsa ngendlela leyemukelekile yekubhala.
Umcimbi wekuvalelisa labafundzi belibanga lelishumi nakubili wentiwa ngembi kwekutsi kuvalwe emaholide entwasahlobo. (1)
- 5.3 Hlanganisa lemisho lemibili uyente ibe ngumusho munye.
Thishelanhloko ufuna bafundzi baphumelele ngemalengiso etifundweni tabo. Bafundzi bona bayangabata. (1)
- 5.4 Kuletheksthi lengenhla khokha umusho lonemphambosi yekwentana lesho **kulitjatwa**, uwubhale phasi. (1)
- 5.5 Shano kutsi lesabito lesidvwetjelwe sisebentani kulomusho lolandzelako.
Batali bona bayangabata, ababetsembi bantfwababo. (1)
- 5.6 Bhala phasi umusho lokuletheksthi losendleleni lecondzisako. (1)
- 5.7 Sebentisa takhi tekuphika kute lomusho lolandzelako usho kuphika.
Ummango ubafisela kuphumelela kute babe baholi bakusasa. (1)
- 5.8 Kulomusho lolandzelako shano kutsi incenye yalesitfo senkhulumo lesidvwetjelwe lecindzetelwe isebentani?
Inkinga lenkhulu kutsi abaketayeli nekutifundzela. (1)
- 5.9 Bhala lenkhulumo lolandzelako, leyinkhulumombiko, ibe yinkhulumongco.
Bafundzi batsi abakutsandzi kulandzelelwa etifundweni tabo. (2)

[10]

SAMBA SIGABA C: 30
SAMBA SAKO KONKHE: 70